

OMPUMBWE YOMAMBO OPAKRISTE



30c

No. 16

ISBN 0-620-06828-0

OMPUMBWE YOMAMBO OPAKRISTE MOSHITAISHAKUNENE OTAI HEPEKE

Omahepaululo omOmbibeli, otaa topwatopwa peembapila dongaho, di tukulilwe ovanhu va ka leshe. Nomihoko; Ovashihokwe nOvavale ovo aveke va lundululilwa Okatekisa momalaka avo, osho sha holoka mehepu lomupashukili woshitai shaKunene, omufifa Noa Ndeutapo.

Omuwiliki woshitai shinya Ndeutapo, okwa indilwa kOshoongalelekeleki sha ELOK neudo, mOngwediva e shi fatululile Onghalo yoshitai shinya tashi longwa kOngeleki ei, pamukalo wetumo, nhumbi ya tya.

Mehepu laye, Ndeutapo okwa ninga okandjokonona kaxupi, nhumbi oshitai osho sha holoka po. Okwa tumbula yo oiwana i li musho ooshimwe nooshimwe. Kakele komaudjuu a etwa koita moshitukulwa osho, okwa ulikwa yo kehala liwa lovakalimo okupwilikina eendjovo dexupifo.

Opo pa holoke epyatumo linya, onghe-ndabala oya dja movatumwa Ovasoomi ovo va fikile kOwambo 1870. Moule womido 90 da dja ko, pamwe novadalelwa mo, Ovasooni venya ova twala evaangeli meni laAngola, moshitukulwa shaKunene.

Kunene onhele i li muAngola pokati komilonga mbali; omulonga waKavango nomulonga waKunene, oko sha lukilwa kouninginino. Koumbuanhu ongaba yaAngola naNamibia.

Omihoko dhi li moshitukulwa osho ongaashi; Ovambadja, Ovakwanyama, Ovakafima, Ovavale, Ovandobodola, Ovanghumbi, Ovahanda, Ovahinga, Ovanghwanghwa, Ovandongona Ovashihokwe, Ovangangela nOvawanghala.

Pauyelele wa yandjwa komupopi, evaangeli otali udifwa ashike, mOukwanyama mOmbadja, mOshihokwe, nomOnghumbi. Oiwana ikwao otai teelele nenota linene.

Mokuyelifa natango ehovelo loshilonga shevaangeli mwinya omuhepaululi Ndeutapo okwa holola kutya konima yomahepeko manene ovanashilonga sheudifo levaangeli muAngola, oo a twala fiyo omefyo lomutumwa Filippus

Kamati 17.7.1933, oshivelo shevaangeli mwinya osha ka yeululwa 7.4.1960 eshi omupangeli Jose Maria Preira, a nyola omukanda wediminino leudifo levaangeli moshitukulwa osho, nde te u pe omutumwa omufita Simson



Mbaka taa monika mefano ndika, aanashilonga yopombelewangeleki pethimbo taa laleke omumbisofi Dumeni a ye koshigongi sha LWF kuBudapest, yo nameme Hilja

Shivute. Ehokololo alihe tala kepanja 6 na 7.

Tala kep. 2

NIINKOTI TA TI SHA KOMAYAMUKULO

GOMAGONGALO

MOmukwetu gwa zi ko, otwa li twa gandja ehokololo lyekonakono ndyoka lya ningilwa momagongalo nolya li lya tulwa kumwe komusita Elia Niinkoti. Pehulilo lyekonakono ndyoka otwa li wo twa uvaneke tu ka holole shoka omusita Niinkoti mwene e shi holola kombinga yomayamukulo gomomagongalo.

Omusita Niinkoti (45) oku li ngashingeyi omusita gwaavu moshipangelo shaNakayale, mOmbalantu. Okwiilongo uusita muPaulinum, Otjimbingwe nomuSoomi okuza 1968 sigo 1974 sho a yapulilwa uusitagongalo komumbisofi Auala.

Okwa langekwa omusita omuwiliki mOshakati, e ta ka ninga omulongi gwaasita kOtjimbingwe, e ta ka langekwa ishewe omulongi mEnongelo lyaayakuligongalo, hoka a zi sho a yi kOnakayale.

Kiinima mbyoka ya yamukulwa komagongalo, Niinkoti okwa ti, ye okwa pewa ompito yokuholola omadhiladhilo ge kiinima mbyoka ya hololwa po komagongalo. Okwa tsikile a ti:

Pakuwatelwa ngele kuuteologi nenge kowino mboka nda likola miilonga yuusitagongalo, onda eta po wo iinima mbyoka, okupendula ombepo yoonkundathana kombinga yomaudhigu ngoka taga kudhile okukalamwenyo kwaakriste momagongalo.

A. Omateko goondjokana.

Eteko lyondjokana oshinima shaa na epopilo mOmbimbeli. Mat.15:19 Jesus ota koleke kutya ondjokana moka omuntu a tulwa kumwe namukwawo kuKalunga, itayi kuthwa nande oonkondo kokuhengathana kwawo, aawe. Ehangano ndyoka otali kala aluhe, nonando ya topoka. Mat. 5:32 Luk.16:18

Ompango yoshigwana shAajuda oya li ye egululila omulumentu uuthemba wokuhenga po omukiintu gwe, uuna a hondele. Oohapu dhaJesus meyamukulo lye sho a ti "oshinima shilwe shaa shi oluhondelo," Mat.5:32, kadhi shi okuuvika ko, kutya okwa zimina ehengathano molwoluhondelo, ihe oku ulike ashike kompango ndjoka, mokukoleka ompango ndjoka, kutya omulumentu ngele ta longo pampango ndjoka, ke na ondjo.

Omagongalo otaga pandula Ongeleki sho hayi ziming eteyo lyoondjokana,

uuna lya ningwa paveta notagi indile aateyi yoondjokana ya kale haa tulwa koki yegeelopotudho.

Omakankameno gOngeleki yetu kombinga yeteyo lyondjokana oga yela moshitokolitho 53 (b) shOmaufomhango, sho mwa tiwa ondjokana otayi vulu okuteywa omolwoluhondelo nenge uuvu uudhigu....

Osha holoka puuyelee mekonakono ndika, kutya osha pumbiwa Ongeleki yi talulule oshinima shoka shomateyo goondjokana yo yi ninge po omautho omape taga mbilipaleke omagongalo.

B Eiteeko lyoohapu dhaKalunga

Omagongalo ihaga endeleele po aakwanegongalo moku ya pa ombili yegongalo, uuna taye yi pula. Omwaalu omunene hagu tulwa megeelopotudho lyOngeleki, ogwaayoni yoshipango oshitihamano.

Aantu mboka kaye shi aaikukutiki pashitokolitho 72 shOmomaufomhango, yo kaye shi ando aatsindumbo nomalandulathano gegongalo. Aantu mbano ohaa kala aapu naapenda mokukonga ombili yegongalo, ihe ihaa endeleele po.

Opwa pumbiwa eutho lyowina lyu ukilila eyono lyoshipango shoka oshitihamano, pu talwe iinima mbyoka yi na okutalwa meitedhululo lyomuntu ngoka a vule okupewa ombili kegongalo.

Eiteeko limwe lyaakwanegongalo pamwe ohali zi wo mpoka sho Esakramendi lyUulalelo Uuyapuki tali topolwa pamwe meulumo enene, sho mOsoondaha siku ndyoka mwa li mwa tulwa iinakugwanithwa iikwawo oyindji. Itashi tungu we oomwenyo dhaakwanegongalo.

Ethimbo lyelongelokalunga nali longithwe nawa, oongundulwiimbo odhindji nadhi topolelwe omathimbo goopala.

C Okuya koonganga

Einkelolo lyoshigwana moonganga oli li

po lya kola natango, nonando Ongeleki ya kala ethimbo ele tayi kondjitha oshinima shoka. Osha holoka sha yela pakonakono ndika, kutya epango halyo alike hali kongwa poonganga ihe nomolwomaudhigu wo gi ili nogi ili.

Omakankameno gomagongalo mokupangula uunganga, oge li "eenov" na "aawe". Omagongalo gamwe oge ekelahi kokule epango ndika lyopamithigululwakalo, manga gamwe taga tala kutya emenkulo niifundja oyo owala iinima tayi kudhile mepango ndyoka.

Okutala ekonakono omuntu oto pendulilwa omapulo ngaashi: Etompelo hali longithwa kOngeleki mokupangula mboka ya pangwa koonganga, olyo ndika kutya oya taaguluka oshipango shotango. Osha fa etompelo ndika inali yela nawa nokali na uuyuuki pakutala.

Omuntu ngoka a pewa owala iigwanga konganga e ta kungu, e ta shuna kaandjawa, okwa taaguluka ngiini oshipango shotango? Okukonga ealudho ponganga okuthike pamwe nokukonga ealudho pundohotola. Ayehe omiiti taa gandja, omuntu e ta aluka.

Okupangwa kashi shi oshinima shopauteologi noshopalongelokalunga, ihe oshinima shopankalathano. Pakutala kwandje, elalakano lyOngeleki okukelela aantu yaa pangwe koonganga, okugamena owala aantu kepango lyaa na owino wa gwana ndyoka tali vulu okweetela olutu oshiponga sheso nokuli.


Uunganga wa nika uumpulile mokuyeleka nuunganga wepango, owo oshinima sha nyata unene noitashi vulu okwiidhidhimikilwa kOngeleki, oshoka osha tsa ondumbo nelongo lyuukriste.

Uunganga mbuka hau kwatha aantu ya kale ye shi "okutala kokule", ya kale ye na omwenyo omule, ya kale nelago, ya kale aayamba nohaa tilika kooyakwawo, uunganga mboka otau fala aantu mesimaneko lyiikalunga nomokutaaguluka oshipango shotango. Hos.4:12-14 Jer.2:27-28;3:9

D) Okukala niimenka

Oshimenka osho shoka omuntu te shi tala shi na oonkondo dhohandiyaka nohe shi longele. Otashi vulu okukala oshiti, emanya, ombepo nenge oshinamwenyo. PaMbimbeli, oshimenka oshikalunga. Ehol.9:20, 4Mos.19:4 1Kor.10:14 Kalunga ohe yi geele. 2Mos.20:3-5

Omayamukulo gomagongalo oga holola puuyelee, kutya ondunge yoshimenka pethimbo ndika, oya kana. Omukwanegongalo ngele okwa yi koonganga nenge molufuko, ohaku tiwa okwa yi miimenka nokwa yono oshipango shotango.



Omusitagongalo Elia Niinkoti, omuhungimwenyo moshipangelo shaNakayale, mOmbalantu, oye a kwatha okutula kumwe omadhiladhilo gomagongalo sho ga yamukula omumbisofi kombinga yonkalamwenyo yopakriste.

Ondunge yoshitya okumenkula otayi pumbwa okuyelithwa nawa.

E) Uulodhi

Ope na ompumbwe natango yokukonakona nawa oshinima shuulodhi nkene shi li mokati kaakwanegongalo, opo Ongeleki yi mone uuyelee wa gwana mokuninga sha kombinga yasho.

F) Uunkolwe

Omayamukulo gomagongalo oga holola kutya aantu otaa nu iikolitha pamatompelo gopaali; a) molwomaudhigu ye ga humbata koomwenyo b) omolwokwaaputuka aniwa.

Omafatululo omakwawo ngaashi, kutya aantu otaa nu ya tse kumwe nethimbo lyeputuko nolyehumokomeho nenge aantu otaa nu yi iulike kutya yo aayamba noye na iimaliwa oyindji, otashi koleke etompelo ndyoka lya hugunina.

Aakwanegongalo naa tsuwe omukumo ya kale haa matula oomwenyo dhawo uuna dha humbata omaudhigu. Olwindji aasitagongalo ihaa inekelelwa nemanguluko omaudhigu gopankalathano kaakwanegongalo yawo, kakele shila uuna ga eta evundakano megongalo ngaashi kombinga yomahengathano moondjokana.

Ongeleki nayi longekidhile oshigwana eyakulo lyopahungomwenyo kaatseyimwenyo ya dheulilwa nawa oshilonga shawo, opo aantu ya manguluke wo okulongitha ompito ndjoka.

Kombinga yokwaaputuka kwoshigwana, oshigwana nashi kwathwe opo shi tseye kutya aanandunge oyo mboka ya hala okukalamwenyo ku na elago ihaaku vundakana niikolitha nando.

Omakwatho omakwawo moshinima shika; aanashilonga naanasikola naa indikwe okunwa iikolitha. Oonkolwe nadhi ningilwe ehungomwenyo lyoonkundathana oonde. Epangelo nali ngambeke elanditho lyiikolitha moshigwana. Aanona yomimvo 10-18 naa ningilwe oveta tayi ya indike iikolitha.

G) Omalufuko

Pakonakono lyomundohotola Maija Tuupainen, oomvula dhokufukala momihoko adhihe dhAawambo okuza 10 sigo 30. Mokufukikwa omukiintu ota yakulwa miinima iyali:

- a) Ota kuthwa oshipwe
 - b) Ota pewa eyambeko lyoluvalo.
- Ngele okwa ningilwa mbika, ota talika a longithwa nokwa ninga "Omwalikadi". Omukiintu a fukala oye wo ha vulu okuhokanwa. Osha dhilikwa pashiwambo okuhokana omukiintu inaa fukala.

Omayamukulo gomagongalo oga holola puuyelee, kutya Ongeleki noshigwana otaa tsu kumwe mokwaazimina okumita, ihe ope na eyooloko momafatululo. Ongeleki otayi tala omulumentu ota mitike ngele okwa gandja ela komukiintu ine mu hokana. Manga oshigwana otashi tala omulumentu okwa mitike ngele okwa gandja ela komukiintu inaa fukala.

Eyooloko ndika otali eta eipumomumwe lyOngeleki noshigwana. Ongeleki nayi yelithile aakwanegongalo eyooloko ndika, kutya Ongeleki otayi popile ashike omulumentu nomukiintu ya kale pandjokana ngele ya hokanathana. Ngele hasho, nonando omukiintu oku kale a fukala pashigwana, nena paukriste otaa talwa ye li moluhondelo.

Omagongalo ogendji oga gandja etompelo, kutya omukiintu oha fukikwa, opo a ze oshipwe, oshidhila nomupya. Ohango yomongeleka oya talika tuu tayi kutha omukiintu oshipwe shino?

Ngele hasho, omukiintu oha ka ningilwa sha mbela, opo aantu yu uve ombili moshinima shono? Omuyamukuli gumwe okwa popya kutya mohango yopakriste pethimbo ndika, omwe ya uupagani uupe, omufuko ha zalekwa ondjaya, ha gwayekwa omagadhi esiku lyomaimbilo noha nwethwa omalovu poshinyanga shondjugo. Omolwashike mbela iinima mbika tayi ningilwa omufuko omukriste?

Taku tsikilwa

ONDILO YUUGUNDJUKA

Oshitya osha tseyikila miipindi. Aantu oya hala iinima yi na ondilo, netompelo, kutya oyo ya kola niiwanawa. Iinima yondilo ihayi landwa ku kehe. Oyendji ohaa landa yombiliha yo yi ihupithile po. Ihe osha konekwa wo, kutya okulanda nombiliha okwo ehupitho lyeliko.

Kombinga yomugundjuka, ondilo otayi konakonwa mushoka a tegelelwa e shi ninge nomethimbo ndyoka te shi ningi. Omugundjuka oye ngoka e na oonkondo nuukolele wa gwana.

Oye ekwatho lyaakuluntu noshigwana, ti i-longekidhile onakuyiwa opo a ka kale omuwiliki, omusita omulongi nosho tuu kehe eithano okuyakula oshigwana komeho.

Ngele ano oye he, yina yoshigwana ngaaka, oku na ihe okukala omunashili, omukriste ihaa tenguka methimbo lye lyuugundjuka. Hankolwi, hamuteyi gwoondjokana dhaantu nosho tuu omauwiniyi galwe kehe, ngaashi uufuthi nedhipago.

Ondilo yuugundjuka moshigwana muka oyi li po tayi ende tayi kana mo omoluwinayi wa popiwa metekelo. Aagundjuka oyendji oya gwile momwigo gwomutondi. Ihe tu ihuleni omuntu omukulu nomuzala omuntu omupe.

Eve Amunjela

Eyakulo lyopadiakoni mu ELOK inali holola natango uupe momeho gaSuoma

KuSebulon Ekandjo

“Ngaashi omukalo gwokutelekela komasiga gatatu mOwambo gwa kala omimvo nomimvo gwaa na elunduluko, osho tashi monika nomeyakulo lyoshilonga shuudiakoni mOngeleki ya ELOK,” osho omudiakoni Suoma Kaapangelwa, a lombwele egongalo lyaShakati, omasiku ga zi ko.

Metalelopo lye lyopambelewa kegongalo ndyoka petamekolela lyomwedhi nguka, Suoma okwa ti, kutya nonando evaangeli olyu uvithwa mpaka oomvula dhi vule ethele limwe, kombinga yeyakulo lyopaudiakoni sigo onena itali holola nando ekoko lyasha momagongalo.

Mokudhiladhilitha egongalo, kutya oshike a hala okupopya, oku ulike koongundu dhi ili nodhi ili momagongalo shoka dha li dhi na okuninga po omolweyakulo lyomuntu ngoka e li mompumbwe.

“Oongundumbimbeli odhindji ihadhi longelwa piilema momagumbo, oosikola dhOsoondaha pomahala ogendji ihadhi yi ko kaaposi, iilema kelongelokalunga ihayi thikithwa ko, osho wo oongundu dhaakiintu momagongalo nodhaalumentu, ihadhi leshele aakulupe sha,” osho a ti.

Manga inaa hiya egongalo li itule tango peha lyomuyambidhidhwa noli uve ko ompumbwe ye, okwe li yelithile tango nkene aayambidhidhwa haa vulu okuholoka po taa zi moongundu adhihe dhaantu, aayamba naathigona, aanene naashona, aana ndunge nomagoya.

“Kashi shi nando oshikumitha kungoka wa li ohela omunameho, nena ou li omuposi, nenge wa li ohela omundjolowele ihe nena ou li oshilema. Onke tu yakuleni moshilonga shika moka natse ongula tatu ki iyadha mo tu li aayakulwa,” osho a kumagidha egongalo ndiyaka konima yelongelokalunga.

Omudiakoni Suoma okwa pitile osikola ye yoshilonga sheyakulo 1979 mEngela. Okwa langekwa kELelelongeleki mulimwe lyomomapyatumo gomUuninginino wOwambo, Okatseyidhi. Iita sho ya halakanitha omapyatumo ngoka pomimvo 1980 na 1981, Suoma okwa galukile kegongalo lyaandjawa Onangalo.

Omumvo 1983 okwa hogololwa koshigongi shoshitaingeleki shiyaka a ninge omudiakoni gwokupapudhula omagongalo gomoshitayi shoka.

“Ondi li po tii shi dhiladhila ngashingeyi, ngele komeho ondi shi okukutha nando omasiku ogendji kashona okulonga megongalo limwe, oshoka ethimbo ohali kala efupi unene,” osho ye mwene a hokololele Omukwetu, pawino we mboka a

dhimbulula nomatalelopo gomagongalo 26 ngoka e ge ende omumvo gwa zi ko.

Ngashingeyi oha kala unene konyala omasiku gaali megongalo kehe, moka ta popitha tango uungundu wuudiakoni negongalo alihe lwahugunina.

Noinaa holola nando omukundu gwasha gwomalweendo ge momagongalo, Suoma okwa minike ndje owala nombili a ka thikamene oompagila dhoondjila a tale ngoka te mu pe olefa, ye a ka tsikile iilonga ye.

“Komagongalo ngoka ge li meni lyookilometa 40, ohe kayile okambasikela kandje nohashi ende ashike nawa,” osho a tumbula pOmukwetu nombepo yi uvite uuntsa moshilonga she.



Omudiakoni Suoma Kaapangelwa ta popitha egongalo lyaShakati.

Konima yoshipopipiwa she shoka e shi ningi konyala uule wominute 10, Omukwetu okwa pulakene yamwe taa ipopile, kutya oshitayi shiyaka osha li sha longekidhwa kOmbepo, okuhogololela Suoma oshilonga shoka.

IINIMA YONALE ETA KONIIPA YI PUNGULWE

Omapipi nomapipi oga ya nota ga yi. Omapipi omape ota ga thigwa mpaka taga tsikile sigo esiku Kalunga ta hulitha po uuyuni. Oshi li aluhe elyenge nongodhi ombwanawa mondjokonona yoshigwana, uuna sha tseya onakuziwa yasho.

Elyenge ndyoka otali mangele kumwe omapipi nosho wo oshigwana ashihe, uuna epipi egundjuka tali tseya shoka omapipi ngoka ga tetekele ga li haga longitha nonkene ga li.

Oshike sha li uuyamba wago noshike sha li sha simana pethimbo ndyoka. Ontseyo ndjika otayi kwatha epipi egundjuka aluhe mokyulekanitha niinima yopethimbo lyalyo.

Omithigululwakalo adhihe odhi na oshilonga, ihe niilongitho wo mbyoka ya li ya longithwa pomathimbo ga yi. Otaku monika aantu unene aanona yepipi egundjuka mboka yaa shi iinima mbyoka ya li ya longithwa komapipi ga tetekele momagumbo pomalugo, miigunda nosho palwe.

KOniipa oku na ongulu onene tayi gwanene iinima oyindji yomaludhi ngoka. Aakuluntu mboka ye na natango iikulunima ya li ya longithwa nale, otqa indilwa ye yi tume kOmbelewangeleki.

Otaa indilwa ye yi tume meukililo nenge ye yi pitithile kiinyangagongalo nenge ya tseyithile ombelewa yi yi ile ko, oyo, yi pungulilwe omapipi tage ya.

Oshiholelwa shiinima ya pumbiwa ongaashi; oompalo dhomongwa, omatati gonkandja, omagonga, omihanga, oondjuhi, oonkuturwa, oongondo, omatenga, iitenga, oombako, omaludhigo, oongaku dhoongombe, (oontsakaya) omakwilika (iimona) niikwarwo oyindji ya fa mbyoka.

Tala oshinima shika ongoshinima shi na ondilo, uuna sha pungulilwa omapipi tage ya.

Petrus Shipena



Aantu ye vule 12,000 oya kala meegululo lyoshigongi shOngongahangano yAakwaluther muBudapest shoka sha tamekwa nelongelokalunga.

ETOKOLO LYEGEELO LYAAKWALUTHER OLYA LI PO NGEYI

Noluhodhi olunene oshigongi oshiti-6 shOngongahangano yAakwaluther kuDar es Salaam, osha thiki sigo oompoka, kutya natango Oongeleki dhAatiligane muumbugantu waAfrika dhe ekelehi okatongotongo nodhi hulithe po omatopoko mudho gopaukwamuhoko.

Nokuli oongeleki ndhoka odhi ikutha mo mehempululo lyuukumwe lyokuDar es Salaam ndyoka li li omukanka guukwashilyo mOngongahangano yAakwaluther muuyuni. Onke oshigongi shika osha thiminikwa okuhulitha po manga uukwashilyo wOongeleki ndhoka netegameno, kutya onkatu ndjoka otayi ke dhi kwatha okuya mehempululo lya yela okukondjitha okatongotongo nokuhedha muukumwe noonkwawo muumbugantu waAfrika shi ilwetikile.

Konima yetokolo ndika, Oongeleki adhihe iilyo mEhangano ndika, odha kumagidhwa dhi ikonakone mudhodhene muuyelee womanyolo omayapuki, opo dhi ekelehi omukalo kehe guukwamuhoko mokati kadho.

Ewilikongundu lyehangano ndyoka olya thigilwa oshimpwiyu okukutha po egeelo koongeleki ndhoka, uuna pwa dhimbululwa okatongotongo ka hulithwa po mudho momagongalo gadho.


Oongeleki onkwawo etokolo olya ti nadhi gandje wo ekwatho kehe tali vulikapo, opo evaangeli lyesilohenda lyomuJesus Kristus li hempululwe nuukumwe wOongeleki u ye puuyelee.

Ekwatho ndyoka olya kwatelela mo omatalelathanopo nOongeleki ndhoka dhomuumbugantu waAfrika noku dhi tsa omukumo dhi tsikile okulalakanena uukumwe noku dhi galikanena wo.

Oshigongi shaayehe shOngongahangano yAakwaluther 1977 muDar es Salaam, osho sha zile elondodho ndyoka lya kola kOongeleki dhAatiligane muumbugantu waAfrika, ngele otadhi tsikile nomulandu gwokatongotongo miilonga yadho, onke oko kwa kankamekelwa etokolo lyadho kuBudapest.

Sebulon Ekandjo

Dumeni muukwashilyo wewilikongundu lyAakwaluther



Omumbisofi Zoltan Kaldy (65) gwaBudapest ngoka a hogololwa a ninge ompresidende gwEhangano lyAakwaluther ayehe muuyuni (LWF) omimvo hamano tadhi landula.


Oshigongi shoka osha hogolola omumbisofi Zoltan Kaldy gwaHungary a ninge ompresidende gwOngongahangano yAakwaluther momimvo hamano tadhi landula, peha lyomumbisofi Omuyafrika Josia Kibira gwaTanzania ngoka a hulitha ko oshikako she.

Omusamane gwomimvo 65 Kaldy, otaku tiwa oye gwtango mokuhogololelwa oshilonga a za koshitopolwa shoka shaEuropa lyokUuzilo.

Iilyo iipe yEwilikongundu lyEhangano ndyoka nayo oya hogololwa mooshigongi shoka, moka omumbisofi Kleopas Dumeni gwa ELOK, a hogololelwa mo pamwe nooyakwawo yane peha lyaAfrika.

Opwa etelwe moshigongi shoka natango omathaneko gamwe, kutya aawiliki yomOngongahangano ndjoka mboka yokuAmerika noyokuEuropa, omwaalu gwawo gu shonopekwe, mo mu gwedhelwe yomiilongo yaAfrika, Asia naLatin Amerika. Ethaneko ndika inali pita.

Sebulon Ekandjo



Omumbisofi K. Dumeni

OKWIINEKELA KALUNGA

Tango kongeni ano oshilongo shaKalunga nuuyuuki washo, nena mbino ayihe otamu yi gwedhelwa ko (Mat. 6:33). Aanelago aana mbili, oshoka oyo taa ki ithanwa aana yaKalunga (Mat.5:9).



Mefano ndika, otamu monika Aanamibia ya kuutumba poshitaafula shawo. Okuza kolulyo; omusita Heikki Ausiku, omulongi Hilja Shivute, omumbisofi Dumeni, e taku landula omuwiliki gwOngoleki ya ELK, H. Fredrich.

OMUMBISOFI NKENE TA TALA OSHIGONGI

Oshigongi osha li oshinene tashi kumitha. Uunene wOongeleki owa li tau dhimbululwa mpeyaka sha yela nkene wa konda oongamba dhiilongo naambyoka haku tiwa oyomulandu guusosiale. Aantu yomalwaala gomaludhi oge ndji, haangoka ashike haku tiwa Omuluudhe nenge Omutiligane ihe aantu yomalaka gi ili nogi ili, ayehe oya li kumwe.

Uukumwe mbuka omuntu owa li u ulwete kombanda, ihe ou uuvite wo nomeni lyoye. **MuKristus omo mu na etegameno lyiigwana**, osho sha li oshipalanyolo shoka komukanka gwasho twa tungathana notwa tsaathana omukumo.

“Muuyuni muka natu tsakanekwe koshike, kamu na we sha shilwe tu shi oku shi inekela, Kristus oye awike etegameno lyetu mwaayihe,” osho sha li ekumagidho lyoshigongi kOongeleki adhihe muuyuni.

Opwa kundathanwa ombili yuuyuni, ondjala yaantu miilongo niilongo, uukumwe wopokati komaitaalo gi ili nogi ili u tungwe, uuthikepamwe waakiintu naalumentu u erwe po nokatongotongo hoka ta ka longithwa muNamibia.

Ekotampango lyehangano ndika, nalyo wo olya li lya talululwa. Oongeleki odhindji muuwike nomongundu, odhe tu uva.ekele oku tu galikanena omolwonkalo yoshilongo shetu. Oya hala wo okusila oshimpwiyu eyakulo lyopambepo mokati kAnamibia mboka ya halakana nuuyuni itaatu ya adha oku ya yakula.

Okulonga oshilonga shetumo kashi shi okulongela yalwe uuwanawa niimaliwa



KuJustus David

Elalakano lyOngeleki ya ELOK okugongala miituthitumo, olyo okutsaathana omukumo moku-longa oshilonga shetumo "niikaha yowala". Efanu ndyoka lyokulonga oshilongatumo "niikaha yowala", otali pendutha ngiika omaiyuvo ngoka itaaga tsu kumwe niilonga yetu.

Oshoka tse ohatu longo nohatu likola sha. Otu na iikaha yuudhilila omagano pombanda. Ihe dhiladhila, tu tye ando aantu yaali ya tsakanene, yo ayehe yaali oye na iikaha yuudha omagano, ando aantu mboka itaa vulu nando okuminikathana, yo itaa vulu okupaathana omagano ga tya ngaaka, okuninga shila shono ya papata taye shi tenteke pevi.

Ihe aantu mboka andola oya li niikaha yowala, ando otaa vulu okuminikathana nokupapatelathana nuupu nokulonga pamwe nokuhumbata omutenge pamwe ongaamwayinathana. Ihe okulonga oshilongatumo niikaha yowala, osho eyele.

Kehe gumwe oku shi uvite ko nawa, kutya kashi shi oshipu tu longe etumo lyopakriste niikaha yowala. Yamwe yomutse oye shi uvite ko ishewe kutya etumo olyo okulongela aantu uuwanawa niimaliwa. Itatu vulu okufatulula etumo ngaaka pakanona.

Eeno, oshi ipopya musho shene kutya nopwaa na iimaliwa itatu vulu okulonga etumo. Ihe oshilongwa shoka tatu shi longwa mpaka, okukala omulongwa gwa-Jesus. Shoka otashi ti, okugandjela yakweni omwenyo gwoye nonando u li iikaha yowala.

Okugandjela ooyakweni ethimbo lyoye, omagano goye, uunongo woye nosho wo eliko lyoye. "Okugandja oku na elago komeho gokutaamba." Okugandja okwo olunza lweyakulo komagano gaKalunga ngoka e ge tu pa.

Ihe natango tuu okugandja akuke mukwo kwene okwa fa owala omuntu ta hakele neke limwe. Ontopolwa onti 13 yEvaangeli paJohannes, otayi tu pe efanu ewanawa ndyoka lya faathana naandyoka lyomopolwa onti 12.

Aalongwa oya li inaa nyanyukwa noya geya nokuli sho Jesus a li a hala okuyoga ompadhi dhawo. Petrus okwa ti, itandi ku niti na u voge ompadhi dhandje, etha ndje.

Ihe Jesus oku ulukile Petrus kutya oku na ethimbo lyokutaamba.

Efanu ndika otwe li pewa lya yela nawa komunyoli gwevaangeli ndika, kutya manga ku na ethimbo lyokugandja, oku na wo ethimbo lyokutaamba. Ihe uuthikepamwe mbuka u li pokati kokugandja nokutaamba, kawa li wa tseyika kaaleshi yopethimbo ndiyaka.

Mehistoli lyetu lyetumo, omuthindo ogwa kala owala hagu tulwa kokutaamba, ihe hakokugandja nando. Ando tu lundulule onkalo ndjika, ando otatu yi monkalamwenyo onkumithi ngiini?

Oshipatululo shokugandja nokutaamba otashi adhikwa owala metopolelathano. Shaashoka tu shi na osho omagano gaKalunga. Jakob Omuyapostoli ota nyola: "Oshipewa kehe oshiwana noma magano ga gwana, ohaga zi kombanda, kuHe yuuyelele." 1:17.

Shaashoka tu na oshaKalunga, naakriste oya li ye na okusinda omaiyuvo ngoka gokudhiladhila kutya oyo ooyene yomaliko. Mokukwatha ooyakwetu katwa li tu na okudhiladhila, kutya otatu gandja sha shetu yene. Omuntu oye omutonateli gwowala gweliko lyaKalunga.

Ngele oto hempulula kutya ashihe u shi na osha zi ku Kalunga, fatululila ndje: Omolwashike we shi ndalapatela, e to shi ningi po shoye awike?

Kuku Michael Tobias, okwa mana oondjenda dhe 2.8.1984 moshipangelo shOngeleki pOnandjokwe mepipi lyoomvula 97. Nguka oye gumwe gwomaana yaashashwa yotango pOmulonga 1884. Egongalo lyawo Omulonga mOndonga.

Okwa thigi ko omuselekadhi, oyana yaheyali naatekulu inaa yalulwa. Okwa dhiginine eitaalo sigo opehulilo.

T. Shipuka Michael

2.

**Aakwanambwiyu yandje
Epaha ndi lyandje
Akutu etopoko
Oli noshintoko
Li ziyalelekitha
Noli pongolitha
Omwenyo sho gwa zi mo
Mbepo ya fudhwa mo.**

3.

**Aakwanambwiyu yandje
Otamu topoka
Mpan'uuwehame wandje
Sho tamu topoka
Tand'imanana te si
Te kukuta te si
Mukadhandje ta lili ndje
Omuwa ta taamba ndje.**



Popepi nomushigakano mefano ndika, otapu monika nakusa Mikael Tobias Shilunga, a thikamekwa koshipala shoshituthi Pomulonga, moshituthihambelesho shOngeleki eti

6.1.1984.

ELONGO LYAANONA YA YOOLOKA PAMAGANO

Shimpa tuu to uvu omuntu ta popi omagano nenge oshitalenti, nena epulo otali penduka mbala, kutya omagano ano oshike? Aatseyimwenyo dhaantu oyendji oya kambadhala okundjandjukununa efatululo lyomagano ngeyi:

a) Omagano omukumo gwokuvula omuntu a pyokole okulandula nawa.

a) Omagano ogo epyokoko lyokulandula iinima mbyoka yaa shi okugumwa noku yi uva ko.


b) Okwiilonga nenge epyokoko lyokulikola sha moowino ndhoka omuntu a tsakaneke.

c) Okupyokoka okwiikwatakanitha nonkalo kehe ompe nenge noonkwatavi ndhoka ta tsakaneke noku dhi monena omayamukulo ga yela.

(*Colliers Encyclopedia Volume 13. p.92*)

Uukwatya womunona omunamagano

Omunona omunamagano oha dhimbululwa ngele a konakonwa



Omulongi Kauko Shikongo

omakonakono ngoka ge mu nuninwa. Aakonakoni oya dhimbululwa nkene pu na oongundu odhindji dhopamagano gomuntu. Mpaka otapu landula oongundu ne dha simana ngaashi:

- | | |
|--------------------|-------|
| (1) Aanona omagoya | + 5% |
| (2) Aanyengwi | + 25% |
| (3) Aanamagano | + 50% |

(4) Aanamaganolela + 20%

Ongundu yotango oyaamboka yaa na oondunge mosikola, noitaa vulu nando okulikola mo sha, kakele shila ngele taa longwa moosikola dhawo dha sheywa. Aanona aakwawo yalwe otaa vulu okulongwa naanaa moosikola ngaashi tu dhi na.

Nkene omunona omunamagano ta dhimbululwa

Omunona nguka oku na uuyamba wiitya okuyelekanitha omuthika gwoomvula dhe noha popi omatumbulo gomuuule. Oha koneke nawa shono ta mono. Oku na ohokwe yokulesha nokuli manga omushona.

Oku na okatalekonawa, e hole okukonakona iinima ya kitakana ngaashi ootundi, iihauto nosho wo iikwanamashina yilwe. Ohi itula moshinima ethimbo ele noita vulwa nando.

Kakele komaukwatya ngoka omawanawa omunona gwomagano e ga na, oku na wo omaukwatya gamwe omawinayi ngaashi okuhenuka iilonga nenge okukanitha ehala moshinima shontumba.

Omunona omukeenomagano, muye itamu monika uukwatya auhe wa tumbulwa metetekelo womunona omunamagano. Omulongi kehe ta longo uunona, oha tegelelwa a ndhindhilike uukwatya wokanona kehe, opo a tale onomukalo guni po te ka kwatha.

Iikateki yomelongo neopaleko lyayo

Ohashi vulika omunona e na omagano ihe iha ningi nawa iilonga ye ngaashi a tegelelwa e shi ninge. Omunona ngoka ota yalulilwa mongundu yaashunimonima melongo. Opu na iinima oyindji mbyoka tayi eta uukwatya momunona wa tya ngaaka.

1. Onkalo yomegumbo yaa li nawa: Kamu na eimweneneno, kamu na iikulya ya gwana nenge yi na uukolele. Elelo lyondembula, megumbo kamu na ohole nenge aakuluntu kaye mo.

2) Elongo: Kali uvitike ko kaakuluntu, nenge ihali gandjwa nawa komunona, omulongi kee na ohokwe yuulongi, omulongi kee shi omunethimbo nenge kee na eilongekidho miilongwa.

3) Okanona ko kene: Ihaka mono ko nawa, ihaka uvu ko nawa, okankundi palutu, ohaka yolwa kuyakwawo nenge oke na uudhigu okupopya.

Elongo ewanawa tali endeke pamwe nonkalo ombwanawa yokanona, olya pu-

mbiwa. Ku dhigininwe omalandulathano goompango dhelongo, opo iikateki ayihe melongo yi kandulwe po. Aataleli yiikandjo ya kwathe aalongi pamikalo odhindji dhelongo, opo aalongi ya adhe oshinakugwanithwa shawo.

Elongo lyopaungundu

Oshiwana ngele aanona otaa topolwa muungundu pamuthika gwoondunge dhawo nenge paunongo womoshilongwa shontumba. Omulongi ta tameke okulonga okangundu kamwe, manga okangundu okakwawo taka ningi sha shilwe shi ili.

Uuwanawa welongo lyomukalo nguka, okanona kehe otaka vulu okulonga ka manguluka. Otaki igilile wo okulonga meithikameno notashi hulitha po ethimbo lyako lyuutsini.

Omulongi Kauko Shikongo

ESO

Omulumentu omugundjuka gwegongalo lyaElim, mUukwambi omusamane Salatiel Titus Shigwedha Tshittuthi, okwa mana oondjenda dhe 21.5.1984 moshipangelo, konima yethimbo ele lyuuwehame.

Okwa thigi ko oyana yaali nomukadhi.

Risto Ipinge

OSHIFO SHA MWENEKWA

OSHIFO shOshiingilisa shedhina "The Windhoek Observer," hashi nyanyangidwa mOvenduka, osha mwenekeke kepangelo laSouth Africa omafiku a dja ko. Fiyo opapa inaku tumbulwa meyukililo oludi noukwatya woshinyolwa osho sha patiffa oshifo sha tumbulwa.

Ashike otaku fafaekwa kutya omulandu woshifo osho wokukondjifa okatongotongo nowii wako nokukondjela oshili nouyuuki, owo wa twala fiyo omemweneko loshifo osho sha hangwa ashike shi na eedula hamano netata, pakupopya kwaHamushanga washo, omushamane Hannes Smith.

Oshifo shimwe osho nasho hashi nyanyangidwa mOvenduka, 'The Windhoek Advertiser', osha yekele emweneko loshifo osho nokudipaa pamukalo wokuponda pofingo; osha ti yo kutya oshiwana osha haluka nosha tyololokifwa nokutilifwa konghundana oyo; unene tuu eshi oshilongo shi li natango mondjila yokuya kemanguluko.

Advertiser (oshifo) okwa twikila ta ti: "Fye Ovanambia ohatu pula nohatu indile ovapangeli: 'Tu alulileni oshifo shetu the Windhoek Observer', osho oshifo sha nyola.

Hamushanga woshifo osho, kekwafo loohahende voshifo, ota kondjo natango, opo oshifo shi dule vali okunyanyangidwa ngaashi shito.

Oshitopifa sha fudikwa moshipangelo shOngeleki, mOnandjokwe, sha kundana yo muBudapest

Fimbo oshoongalele shinene shOvakwaluther, ovakalimo va dja eembinga adishe dounyuni, shi li moipundi, osha kundana moshipangelo shOngeleki ya ELOK, mOnandjokwe, mwa li mwa fudikwa oshitopifa. Keameno laKalunga osha monika diva.

Onghundana oya tuminwa diva omubisofi wa ELOK, fimbo e li mooshoongalele osho. Nokonima ovakulunhu voshihakulilo osho ova shanga omushangwahokololo ngaashi tau shikula apa:

“Eti 26.7.1984 Okomitiye yewiliko loshihakulilo osho, oya ongala i kundafane oshinima tashi landula:

Meti 25.7.1984 moshipangelo omwe ya ovakwaita va SA ve li moyeendifo youkwaita va djala omidjalo doukwaita novahomata. Ova ti ova dja konomola 53 kOndangwa. Ove ya kombelewa yoshipangelo nova lombwela oomatrona, kutya elalakano lavo okukonakona;

1. Oshipangelo ashishe
2. Ova hala okutala ovanau du aveshe
3. Ova hala okupewa omadina ovanashilonga aveshe mOshipangelo.

“Ndohotola omukulunhu woshipangelo eshi e uya kuvo, ova ti ova hala ashike okumona ovalumenhu nounona. Ova ka ulikilwa momikunda dovalumenhu nokonima ova shivifa kutya otava ka aluka vali oshivike tashi landula. Nomokutala ovanau du inapu dimbulukiwa nande kutya elalakano lavo olashike.

“Nomanga ovakwaita vamwe tava tale ovanau du, ovakwaita vakwao ova li va fikama peenhele di lili nodi lili (ve lihana). Omunau du umwe e ile okupangwa, okwa mona nghe omukwaita umwe ta fe medu nokutula mo sha.

“Ovakwaita ova dja po nokulonda momahauto avo nokuya. Osha li lwopotundi 12.30. Oshinima osha fudikwa popepi noshihauto sha fikamekwa momuti popepi nomukunda wovadali. Ovakwaita eshi va ya, ombelewa yoshipangelo oya shiivifilwa, kutya omukwaita umwe okwa fiya a fudika sha moshipangelo.

“Matrona nOmukulunhu woshipangelo, ova tokola pu ifanwe ovapolifi ve uye va tale kutya oshike sha fudikwa medu. Ovapolifi eshi va ifanwa osha li lwopotundi 3.00 komatango.

“Eshi ve uya olwopotundi 3.30 komatango nova ulikilwa ponhele opo pa fudikwa sha. Eshi va hada po ovamona oshitopifa mokalambo, osho va ti, otashi dulu okweeta oshiponga nefyo. Oshitopifa osho ova ya nasho.

“Konima eshi va ya, otwa shiivifila omukulunhu woshikondo shouhaku, naau a hangika mombelewa yaye, okwa tambula ko etumwalaka olo. Oshinima osha shiivifilwa vali ombelewa yOngeleki pOniipa.

“Meti 26.7.1984 lwopotundi 9.00 wongula, mombelewa yoshipangelo omwe ya omunhu e na omidjalo doukwaita da Suid-Afrika, a homata. Okwe ya pamwe navakwao ve li moshihauto shovakwaita ve li meni loshipangelo.

“Okwa ti oye okwa dja kOshakati, ashike edina laye noilonga yaye okwa anya oku i

popya. Elalakano laye vati okwe ya okukonga ouyelele moshinima shoshitopifa sha li sha fudikwa moshipangelo eti 25.7.1984.

“Kombinga yoshitopifa okwa yandja efatululo, kutya pakuuda kwaye ehupu olo, okwa dimbulukwa kutya oshitopifa osho oshanafangwa. Ashike okwa ti okwa hala e ke shi tume kovakonakoni voitopifa, ye e ke tu shivifile vati enyamukulo olo tali di ko.

“Nomanga omulumenhu ou ina shuna, okwa shivifa, kutya ope na omhumbwe oshipangelo ashishe shi hadwe, osheshi otashi dulika mu kale mu na oitopifa imwe ile yo eendjebo do AK-47 da fudikwa mo vati ku SWAPO.”

(Omushangwahokololo opo wa xulila opo)

Uupononwa wa monenwa omukalo gwokuhupithwa



Uupononwa otau lala mpaka momakende gokupupyaleka paunongononi.

MuColombia opwa ningwa eyelekelo lyokuhupitha unona mboka wa valwa inau thika nawa okuvalwa, nowa ningi uunamwenyo kekwatho lyooyina. Oondohotola yaali; Edgar Rey naHector Martinez, oyo ya hokololwa ya yekelele shoka nosha piti nawa.

Konima yoomvula ndatu dha piti, unona uupononwa moshipangelo shaBogota, oshilandopangelo shaColombia, etata lyawo inali tumwa nando. Ihe sho pwe etwa onkambadhala ndjoka, okwa tiwa oopelesenda 95 dhaanona odha hupu.

Okanona ohaka tulwa mondihikwa yayina pontulo. Shoka pafatululo lyoondohotola mboka, otashi kwatha okanona, ka mone uupyu wa gwana, otaka nyanyudhwa komainyengo gayina nokewi lye nokedhengo lye lyomutima.

“Ihe omukalo ogu na wo ombiliha gu vule kokule ekende lyokupupyaleka”, osho oondohotola mboka ya ti.

Colombia oshi li muumbugantu waAmerika, shi na aakalimo oomiliyona 27 ni hupe. MuBogota amuke omu na ye vule oomiliyona mbali. Eindjipalo lyawo konyala ongaashi mu SA. Aakiintu 1000 mokati kawo 30 oye na unona.

Eso lyuunona olya londa moshilongo shoka. Uunona 1000 tau valwa, mokati kawo 62.8 otau pitilile po. Ompumbwe yoondohotola nayo onene. Aavu ye vule 1000 otaa tegelele ekwatho lyomundohotola gumwe awike. Mpaka aavu ye vule 2,000 oya tala komundohotola gumwe awike payalulo lyomumvo 1973.

Ihe muColombia aantu otaa kulupa kashona sho haa thiki komimvo 65 nokuyeleka mpaka sho taa thiki ashike komimvo 52.

(Star 8.8.1984)

Okatongotongo oka pangulwa noonkondo moshigongi shAakwaluther muuyuni

Omatokolo gi ili nogi ili oga ningwa noga kolekwa moshigongi oshiti 7 shOngongahangano yAakwaluther muuyuni (LWF) nuumvo, okukondjitha okatongotongo mu SA nomuNamibia.

Oshigongi shoka osha li ko pokati kaJuli naAguste muBudapest shaHungary. Aakwashigongi ye vule 1000 ya zile moongelekishilyo 99 dhehangano ndyoka. Gamwe gomomatokolo ga ningwa mo otaga landula mpaka.

+ Oongelekishilyo dhi katuke onkatu yi ilwetikile okuboikota (omukalo gwokwiimba oshinima shaaningwe) iipindi ku SA nokupata omapungulilo gadho moombaanga dha SA.

+ Oongelekishilyo odha pulwa natango dhi kumagidhe omapangelo gomiilongo yadho, omahangano gaanangeshefa nomahangano gaaniilonga miilongo yadho okuhulitha po ekoleko lya SA paukwiita, paipindi yomahooli nopakulongekidhila SA iilwitho yolute.

+ Oongeleki odhi indilwa wo dhi kwathe mokuteta po ekwatathano na SA miinima yopamithigululwakalo noyomaudhano sigo ethimbo ndyoka okatongotongo taka monika ka si.

+ Uukwamuhoko moshilongo kehe womaludhi kehe, Oongeleki odha kumagidhwa dhi u kondjithe dha mana mo nodhi hanagule po omakankameno agehe ge na sha nawo pokati kadho dhene.

Oongeleki yAandowishi muNamibia oya tulwa kOngongahangano yAakwaluther megeelo.

Oongeleki yAakwaluther Aandowishi moshilongo shika, oya kuthwa manga uuthe-mba wuukwashilyo mEhangano lyAakwaluther ayehe muuyuni, sigo ya gandja puuyeleele ewi lyayo mokupangula okatongotongo.

Oongeleki onkwawo ya kuthwa wo uuthe-mba mboka oyAandowishi mu SA moshitopolwa shaKaapa, patompelo naanaa lya fa ekwawo. Etokolo ndyoka olya ningwa nomawi 222 ga kondjithwa ashike komawi 23. Omawi 29 ogi ikaleke pondje yehogololo.


Oongeleki yAatiligane mUushimba omimvo ndhika dha zi ko, oya adhika yi itula mEhangano lyAakwaluther Aaluudhe moshilongo shika, ndyoka hali ithanwa VELKSWA, ihe sigo onena ihayi taamba Aaluudhe momalongelokalunga gayo okuyakulwa kuyo nosho wo kUulalelo Uuyapiki.

Yamwe oye shi ikwata, kutya pamwe itashi ka enda we nawa, sho uumwayinathana tau thiminikilwa po koveta. Ihe omumbisofi Zoltan Kaldy ngoka a hogololwa moshigongi shoka a ninge omupresidende gwEhangano lyAakwaluther, okwa ti, ye okwe shi inekela kutya egeelo ndyoka itali ka kala ethimbo ele, oshoka Oongeleki ndhoka otadhi ka egulula mbala omitima dhadho nokutaambathana ongomuntu nomumwayina.

ANGOLA OKWA LUNDULULA OMULANDU?

Osha kundanwa ngashingeyi mpaka naampeyaka, kutya Oshigongi oshititatu she-tsakaneno lyaSWAPO naakalelipo yepangelo lyaAngola oshi li pokuningwa ishewe. Ehala nesiku inali uthwa natango.

Ombelewa yaKomufala Ndjayi mOvenduka sho ya pulwa oshinima shoka, inayi shi tinda yo inayai shi zimina meukililo. Epangelo



Andimba Toivo yaToivo, mefano ndika ngoka a yalulwa mondjokonona yuupolotika muNamibia, kutya oye e li omudhiki gwEhangano lyaSWAPO, omasiku ga zi ko okwa hogololwa kehangano ndyoka a ninge Amushanga Ndjayi gwalyo.

Omusamane yaToivo (62) okwa mangululwa nuumvo. mondholongo muFebuluali sho a kala mo omimvo 16 peha lyomimvo 20 ndhoka a pelwe, kOntuntu yaRobben.

lyaAngola, omupresidende gwaCape Verde, omupresidende gwaZambia nomupresidende gwalvory Coast oyo ya hokololwa ye li Ehangano lyaSWAPO konima, oshigongi shoka shi ulumikwe.

Aawiliki yamwe yomepangelo lyaAngola, oya hokololwa omasiku ngaka, kutya yo oyi ilongekidha ye ethe po iitsa yimwe mbyoka ya kala haa pula SA e yi tsakanithe, opo AACUBA ya ze mo muAngola.

Inaku monika sigo onena uuyeleele wa gwana, ngele omupopyo ngoka gwa zi maawiliki yaAngola, ogu na uukwashili nenge aawe. Ngele osho gu li ngaashi tagu popiwa, shoka otashi vulika tashi ke etitha po sha oshiye komahilathano ga SA naAngola omolwemanguluko lyaNamibia.

MuFebuluali nuumvo, epangelo lyaAngola olya adhikwa li indile SA a ninge tango iinima tayi landula mpaka, opo AACUBA muAngola ya shune kaandjawa, ngaashi SA te shi pula.

1. Aakwiita ya SA yi ikuthe mo tango muumbugantu waAngola (oshitopolwa shoka ya li ye shi lala okuza 1981)

2. Oshitokolitho 435, shaVVO shi tulwe miilonga, shoka tashi ka thiminika wo SA a tembudhe mo omatanga ge muNamibia.

3. SA, Amerika nookume kawo ya hulithe po iiponokela yawo ayihe koshilongo shaAngola, osho wo omakwatho gawo kuUnita ye ga hulithe po.

Iinakugwanithwa mbika ya ningilwa SA kuAngola, epangelo lyaAngola olye yi endulula ishewe 19.3.1984 konima ashike yomasiku gaali sho epangelo ndyoka lya li lya shaina euvathano na SA yaa hindathane we.

Sigo onena oshitokolitho 435, epangelo lyaAngola olye shi taamba ko, kutya kusho oko tuu ku shi okukankamekelwa omalongekidho agehe gemanguluko lyaNamibia, ashike otaku tiwa, kutya iinima yimwe mbyoka kwa li he yi pula SA, ote yi etha po, nokutegelele ashike iyali yomuyo yi tsakanithwe ngaashi tayi landula:

a) SA i ikuthe mo tango muAngola
b) nomakwatho ge kuUnita gopautondwe nogopaukwiita e ga hulithe po.

Ngele, mbika oya ningwa po, pahokololo ndyoka, nena AACUBA muAngola otaa vulu ihe okushuna kaandjawa na SA ota mono omukumo gwokupitika ehogololo li ningwe mu Namibia.

Aakwiita ya SA muAngola, oya tameke okwiipweya mo kashona nakashona pauvathano lyawo naAngola lyomulwaka 16.3.1984, ihe ohaku tiwa inaa pwa mo sigo onena.

Etompelo lyokwaapwa mo, SA uusama ohe u gandja kuAngola ngoka aniwa te etha SWAPO i inyenge moshitopolwa shoka sha ziwa ku SA manga Angola uusama te u gandja ku SA sho ta ti, oye ta kwatha natango aapiyaganeki yepangelo lye, ongundu ya Unita.

Okuza meuvathano lyawo, okakomisi kombili oka totwa po nokathikama miiloyo ya za momatanga gaakwiita yomapangelo ngoka gaali, opo ka tonatele omainyengo gopaukwiita muumbugantu waAngola.

OVA SHANGELA NGE TAVA TI:

Onghendabala oi dule okumwena. Ohandi pandula unene ngenge hatu udu kutya omangafifi oo e li pomapata ile e li momalukanda a xula po. Otaa xulu po ngenge tava hombolafana, nge oovavali nokuli, otashi kufa po omukundu umwe.

Jason Shilongo
Walvisbaai

Onda yakula OMUKWETU waJuli 15,84 omo omu na oshipopiwa shameme Ngh. Shiyele, kombinga yokwaamena oukadona. Osholela meme, konale ovashamane okwa li hava hombola ovakulukadi ve dulife puumwe, onghendabala inaku kala omukundu oo.

Okakadona nge ka nyonwa komumati, ne ka ku fe po. Ndele oko ka nyonwa po komushamane naka ningwe nee ngahelipi?

L.N.R
Waterberg

Olwindji otwa kala nokugalikanena omvula, ihe otwa kala hatu shi ningi ethimbo lya pwa po, uuna twa dhimbulula kutya omvula itayi loko we.

Onda hala tu ningeni ngeyi. Tu tamekeni okwiindila omvula muNovomba sigo Januari, lwaali ngele lumwe omwedhi kehe. Shika ngele otwe shi ningeni neitulomo, Omuwa ote tu yamukula mbala.

Ondi inekela oyendji omu uvite ndje ko shokanda hala okupopya moshinima shika. Tu ningeni egalikano aluhe kuyele, inatu tokelweni we.

Werner Shiinda
Oranjemund

OMUKWETU waJuli 15,84 otau popi kombinga yeehombombo dovanyasha. Ohai pula ashike, kutya owa diladila tuu nawa, kutya omunhu ta hombola ile ta hombolwa keenghono, oshi li tuu mondjila?

MOMUKWETU waJuli 30,84 otau ti, oshiwa ofuto i wedelwe, vati pamwe ovanyasha tava tila. Oh, vakwetu. Ame omudali mukweni, ndi na ovamati noukadona, ndele oshinima osho tu shi diladileni nawa.

Ounona vamwe otava mitike ve li meefikola, oimaliwa otave i kufa peni? Vamwe kave na oilonga. Aishe oyo oi li ngo komapepe omudali.

Efimbo ola lunduluka. Tu mangeni ashike oukuni kumwe momadiladilo nomomailikano koshipala shaTate meulu, opo ehala laye li wanifwe, ndele ha letu. Ngaashi hatu nyengwa okukufa po oita, osho hatu ka nyengwa okukufa po omanyonauko onunona vetu. Tu puleni

ashike eenghono dOmwene wetu di longe.

F. Nghishakenwa

Eemboloto oikulya iwa nope na vahapu have di landifa noku di kwata nouhasa muhapu unene. Eemboloto ohadi endifwa kombada yoihauto tadi ende mondwi, dimwe to hange da ekelwa ashike mehauto kombada oko ku he na nande oukoshoki washa.

Moihauto ohatu endifa mo oinima ihapu ya kaka ile ya yela, ndele otu na okuyoolola eemboloto di endifwe meedalate deeshipa odo da longwa okuhumbata eemboloto.

Opo tu ha tandavalife omaudu noikulya yetu oyo hai tu kwafa, tu konakoneni oshinima eshi noku shi tala nomesho manene. Tu longifeni oukoshoki tu ha landife oinima ya enda mondova.

Viktor B. Kanhalelo

ESHIVIFO KOMAONGALO A ELOK

Enongelo longeleka ya ELOK otali ningi eshivifo, koilyo yomaongalo, kutya omudo 1985 Enongelo otali ka tambula ovahongwa vape, ohatu tambula ovatekuliumbo 40, novapofi 15, neembolo 15, novayambididwa 15.

Eembapila tadi pumbiwa meindilo movatekuliumbo:

1. Odjapo ile enyolululo lodjapo yongudu yahuuninwa omo wa kala.
2. Eindilo loye mwene.
3. Epopilo lomulongi ile lomufitaongalo.
4. Ombapila yeongalo.
5. Ombapila youndjolowele kutya ou na oukolele.

Ovapofi neembolo novayambididwa natu mone eindilo lanyolwa. Omaindilo aa aeshe ohatu a teelee fiyo 15.11.1984 Omaindilo aa taa fiki konima yefiku olo otaa talwa a tokelwa nokae shi okutambulwa.

Gweni meyakulo

Rev. F. Shikomba

ONAMAGONGWA MOTORS

OYE:

Omulandithi gwoye gwopopepi gwiihauto yoo GM, ISUZU noombaki.

Ila nehala ewanawa kiipindi iwanawa yiihauto iipe niikulu.

Onomola yongodhi, Ondangwa 95.

Victory Gabriel
naDouw Nell

OMUKWETU

Oye oshifo shOngeleki Onkwaevangeli paLuther yomOwambokango. Ohashi nyanyangidhwa mOshinyanyangidho shOngeleki mOniipa. Omukuluntu gwoshifo omumbisofi Dr. Kleopas Dumeni. Amushanga gwoshifo omusita Sebulon Ekandjo.

Ondando yOmukwetu muNamibia naSuid-Afrika R5,00 komumvo. Palwe muAfrika R8,00 nokombanda yomafuta R11,00, komumvo. Mondhila R13,00.

Oondando nomambesitelo agehe naga tumwe kOmukwetu, Oniipa, P/Bag 2013, Ondangwa, 9000.

EV.LUTH.OWAMBOKAVANGO CHURCH PRESS
PRIVATE BAG 2013, ONDANGWA 9000
SWA/NAMIBIA